

mario croes:

26 AÑA DEN PING PONG




FOTO: CHECKPOINT COLOR

Pa promer viaha ela sali campeon di Aruba dia cu e tabatin 15 aña di edad. Awor aki cu e tin 34 aña e por bisa cu ela sali 13 vez campeon di nos isla y e ta posee nada menos cu 39 copa y 27 medaya. Un deportista arubano cu e destaca su mes den e deporte di ping pong specialmente door di su mes esfuertonan y su perserverancia, como cu manera nos lektornan por lesa mas alew, no ta semper ela haya ayudo den su carera deportivo na su isla natal. Mario Croes jr., casá cu Ruth Croes-Arends, ta haya cu e deporte di ping pong na Aruba a bai hopi atras den e 26 aña cu e tin ta praktikele.

Amistad a tene un entrevista exclusivo cu e deportista te ainda mas grandi riba terreno di ping pong actualmente: Mario Croes Jr.

Nos a encontra Mario den su cas nobo cu ela caba di traha na Ponton. Presente tabata tambe su esposa Ruth Croes-Arends y su dos yiunan Mario (8 aña) y Janine (10 aña). Riba nos pregunta cu si su yiunan ta hunga pingpong tambe, Mario ta conta cu nan sa hunga ping pong, pero e ta sperando un mesa nobo pa e pone na su cas.

E no kier sí pa su yiunan cuminsa hunga ping pong mucho liher, como cu e kier pa nan goza di nan hubentud y hunga hopi.

"Mi bida m'a sclavisa na ping pong, mi no a hunga mes, tempo cu mi tabata mucha. Mi kier laga mi yiunan hunga bon hunga y despues ora nan

ta mas grandi cuminsa cu ping pong", asina e ta bisa nos.

NO STROBE

Tempo cu Mario Croes a drenta enlace matrimonial cu Ruth, e mama di Ruth a duna su yiu ún consejo: Mario su bida ta ping pong, asina ta nunca reklamé ni strobé den esaki, pasobra e ta un bon cos. Y awor aki despues di dies un aña casá, Mario ta bisa: Ruth a sigi e consejo di su mama tambe. Nunca ela strobami, alcontrario semper ela yudami.

Amistad: Ki tempo bo a cuminsa hunga ping pong?

Mario Croes: mi a cuminsa hunga

ping pong tempo mi tabata tin mas o menos siete aña. Mi mama a cuminsa siñami, pero mi no a worry mucho. Toch mi a sigi hunga cu mi tata y cu mi otro famianan. Un viaha mi a bai Flamingo Room (Trocadero), caminda tabatin un mesa di ping pong, anto ei nan mi a mira Cholan Jacobs, e tempo ei e campeon di Aruba, hunga.

SMAAK

Esei a dunami smaak pa mi sigi train cu mi famia. Dia m'a cuminsa hunga di verdad mi tabatin 12 aña y mi a cuminsa train cu Cholan. E tempo ei mi tabata hunga cinco te seis ora pa dia. Mi tabata caba di come dies dos or y mei y bai hunga te siet'or y mei di anochi. Tur dia e mesun cos. Mi no tabata hunga ni siña les.

TALENTO

Mario a cuminsa muestra su talentonan ora cu na edad di 9 aña ela sali campeon di Junioren na Aruba. Cu 12 aña ela drenta division di senio-